

Skuvlabálgái buessivdnideapme

Skuvlii vuolgi mánáid buessivdnideame sáhtá doaimmahit giđdat dahje čakčat aiddo ovdalaš skuvlla álgima.

Buessivdnideame doaimmaha báhppa dahje searvegotti eará bargi.

Skuvlii vuolgi mánáid buessivdnideame sáhtá čatnat searvegotti oaiveipmilbálvalussii. Dalle Skuvlabálgái buessivdnideapme-minstara sáhtá atnit heivvolaš osiid. Buessivdnideapme (čuokkis 7) dáhpáhuvvá oskkudovddastusa maŋŋá. Buessivdnidansániid čuovvu ovddasrohkos čadnojuvvo oktasaš ovddasrohkosiid.

Mánát sáhttet vázzit girkui (ruossa)mieđušin álggahanmusihka čuojadettiin.

Buessivdnideame áigge sáhtá lávlut sálmma dahje čuojahit eará musihkka.

1. Álggahansálbma

Sáhtá geavahit ovdamearkka dihte sálmma 434, 450, 452, 459 dahje 477:1–3. Sálmma sajis dahje dan ovdal sáhtá leat eará musihkka.

2. Álggahus

Álgosivdnideapme

Buessivdnádusa lea vejolaš lohkat dahje lávlut.

B/O Áhči ja + Bártni ja Bassi Vuoiŋŋa nammii.

S Ámen.

B/O Min veahkki lea Hearrá,

S almmi ja eatnama sivdnideaddji.

DAHJE

B/O Hearrá lehkos dinguin.

S Nu son lehkos maddái du vuoiŋŋain.

Álggahansánit

Álggahansániid lea maiddái vejolaš ráhkadit ieš.

B/O Ráhkis ustibat, smávvat ja stuorrát. Biibbal muitala, ahte vánhemat bukte mánáideaset Jesusa lusa. Jesus válddii mánáid sallasis ja buressivdnidii sin. Dán buressivdnádusa ja várjalusa mii leat dál ovttas bivdimin, go dii, mánážat, álggahehpet skuvlavázzima.

DAHJE

B/O Ráhkis ustibat. Mii deaividit mánga odđa ášši, go skuvla álgá. Mii dovdat sihke ilu ja fuola. Ipmil lea sánistis lohpidan atnit mis fuola min eallima juohke bottu. Mii giitit almmálaš Áhči ja bivdit su buressivdnádusa, várjalusa ja láidema.

3. Biibbalsálbma

Sáhtta atnit maiddái girkojagi čuovvu dahje eará biibbalsálmmaid.

Biibbalsálmma sajis lea vejolaš lávlut sálmma.

Biibbalsálmma sáhtta lávlut dahje lohkat. Biibbalsálbmii laktojuvvo Uhca gudni. Dan sajis sáhtta atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Dat guđđojuvvo eret fástoáigge 5. fástoáiggi sotnabeaivvi rájes.

Várjal mu, Ipmil,

dasgo mun dorvvastan dutnje.

Mun dajan Hearrái: ”Don leat mu Hearrá,
ii mus leat mihkkege buriid earet du.”

Sál 16: 1–2

DAHJE

Rámidehket Hearrá, oppa eanan.

Bálvalehket Hearrá ilus,

bohtet su muođuid ovdii ávuin!

Dovdet ahte Hearrá lea Ipmil!

Son lea sivdnidan min, ja mii leat su,

su olbmot ja su sávzzat maid son geahččá.

Mannet su poarttaid čada giittoslávlagiin,

mannet su ovdašiljuide máidnunlávlagiin.

Giitet su ja máidnot su nama.

Dasgo Hearrá lea buorre,
su árbmugasvuohta bistá agálaš áigái,
su oskkáldasvuohta sogas sohki.

Sál 100

DAHJE

Hearrá muitá min ja buressivdnida min.

Son buressivdnida Israela náli,
son buressivdnida Arona náli.

Son buressivdnida sin guđet ballet sus,
sihke smávváid ja stuorráid.

Sál 115: 12–13

DAHJE

Mun bajidan čalmmiidan váriid guvlui:

Gos bohtá munnje veahkki?

Mu veahkki bohtá Hearrás,
almmi ja eatnama sivdnideaddjis.

Hearrá várjala du buot bahás,
son várjala du heakka.

Hearrá várjala du vuolgima ja du bohtima
dálážis gitta agálaš áigái.

Sál 121: 1–2, 7–8

Uhca gudni

Gudni Áhččái ja Bárdnái

ja Bassi Vuignii,

nugo lei álggus, dál lea ja álo
agálašvuodas agálašvuhtii. Ámen.

4. Biibbalohkan

Lohkkojuvvo okta dahje moadde čuovvovaš čálabihtáin. Sáhtá atnit maiddá girkojagi čuovvu dahje eará čálabihtáid.

Lohkki almmuha čálasaji.

1 Joh 3: 1

Gehččet man nana ráhkisvuoda Áhčči lea čájehan midjiide, ahte mii gohčoduvvot Ipmila mánnán, ja su mánáthan mii leatge.

Matt 18: 1–5, 10

Máhttájeaddjit bohte Jesusa lusa ja jerre: ”Gii lea stuorimus almmiriikkas?”

De Jesus rávkkai uhca mánáža lusas, divui dan sin gaskii ja celkkii: ”Duodaid, mun cealkkán didjiide: Muđuid go jorgalehpet ja šaddabehtet mánáid láhkásažžan, de ehpet eisege beasa almmiriikii. Dat guhte vuolida iežas ja šaddá dán máná láhkásažžan, lea stuorimus almmiriikkas. Dat guhte vuostáiváldá dákkár uhca mánáža mu nammii, vuostáiváldá mu.

Váruhehket badjelgeahččamis ovttage dáin uhcahaččain! Dasgo mun cealkkán didjiide: Sin engelat almmis oidnet álo mu almmálaš áhči muđuid.”

Luk 18: 15–17

Sii gudde maiddá njuoratmánáid Jesusa lusa vai son guoskkahivččiidaid. Go máhttájeaddjit oidne dán, de šiggo sin. Muhto Jesus rávkkai sin lusas ja celkkii: ”Diktet mánážiid bohtit mu lusa, alletge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa.”

5. Vástádus

Vástádussan sáhtá leat sálbma, biibbalsálbma, lávlla, čuojanasmusihkka dahje jaskes mediteren.

Mánnga deavstta logadettiin biibbalohkan sáhtá vurohallat vástádusain.

6. Sárdni

7. Rohkosoassi

Mánát bohtet áltárgurrii.

Máná lagažat dahje su dikšon ollesolbmot sáhttet oassálastit buressivdnideapmái.

Buressivdnideame áigge sáhttá leat musihkka (omd. sálbma 458).

Vuorrrohkos

B/O Ráhkis Jesus. Mii leat bohtán du lusa,
dasgo mii leat dehálaš bottu ovddas.
Mii bivdit: ráhkis Jesus, buressivdnit min.

S Ráhkis Jesus, buressivdnit min.

B/O Don váldet mánáid sallasat, bidjet gieda sin ala
ja buressivdnidit sin.

Mii bivdit: ráhkis Jesus, buressivdnit min.

S Ráhkis Jesus, buressivdnit min

Buressivdnidansánit

Mánát luoitádit čippiid ala. Sin ala biddjojuvvojit giedat mearkan Ipmila buressivdnádusas.

Buressivdnideame áigge sáhttá leat sálbma, lávlla dahje eará musihkka.

B/O [NN,] Jesus buressivdnidehkos du (skuvlabálga ja oppa eallima).

DAHJE

B/O [NN,] Hearrámet Jesusa Kristusa árbmu ja Ipmila ráhkisvuohta ja
Bassi Vuoiŋŋa oasálašvuohta lehkos duinna.

Buressivdnideame maŋŋá mánát máhccet sadjáseaset.

Rohkos

Sáhttá atnit maiddái iešráhkaduvvon rohkosa. Dat lohkkuojuvvo dan maŋŋá go mánát leat máhccan čohkkát.

Ovddasrohkosa lohkkin sáhttá leat mánná, su vánhen dahje su dikšon ollesolmmoš.

B/O Rohkadallot.

1. Ipmil,
giitu, ahte orut minu ja suodjalat ja várjalat min.

Buressivdnit min dán odda eallindilis.
Buressivdnit min buohkaid:
mánáid, gudet vázzigohtet skuvlabálgá,
vánhemiid, gudet mieđuštit sin,
ja oahpaheaddjiid, gudet váldet vuostái odda oahppiid.
Atte midjiide juohkehažžii roahkkadis ja dorvvolaš miela
ja veahket min luohttit dutnje.
Gula min rohkosa Jesusa namas.

2.

B/O/Mánná

Buorre Ipmil.
Giitu ruovttu ja ráhkkásiid ovddas.
Giitu buohkaid sin ovddas, gudet leat dikšon min.
Buressivdnit sin.

B/O/Ollesolmmoš

Buorre Ipmil.
Mii giitit du dáid mánáid ovddas.
Várjal juohkeovtta skuvlamáná skuvlabálgá alde.
Oro singuin, go sii leat gealdagasas ja balus.
Ráhkát skuvlii buorre ovttasbargomiela.
Atte juohkehažžii buriid ustibiid.
Buressivdnit oahpaheaddjiid barggus ja eallimis.
Atte midjiide vánhemiidda viisodaga leat mánáideamet doarjjan.
Mii guoddit iežamet ja visot áššiideamet du oskálii.
Gula min Jesusa namas.

3.

B/O Almmálaš Áhčči. Don leat gohččon mánáidat du lusa.
Oro min lahka ráhkisvuodainat ja oskkáldasvuodainat.
Gula min rohkosa.
S Gula min rohkosa.

B/O Buressivdnit min min odda eallindilis skuvlla álggedettiin.
Veahket min rávásmuvvat mánnánat.
Gula min rohkosa.

S Gula min rohkosa.

B/O Suodjal min johtolagas ja várjal min buot bahás.
Vuolggat buriid engeliiddát midjiide dorvun.
Gula min rohkosa.

S Gula min rohkosa.

B/O Gáidat min baluid. Atte midjiide buorre ja dorvvolaš miela.
Atte juohkeoktii ustibiid
ja veahket min váldit vuhtii guhtet guimmiideamet.
Várjal, amamet mii givssidit geange.
Gula min rohkosa.

S Gula min rohkosa.

B/O Oro min ruovttu dorvun. Buressivdnit oahpaheaddjiid
ja buot skuvlabargiid barggu.
Gula min rohkosa Jesusa namas.

S Ámen.

Áhččámet

Hearrá rohkos celkojuvvo ovttá jitnii.

S Áhččámet, don guhte leat almmis.
Basuhuvvos du namma.
Bohtos du riika.
Šaddos du dáhttu,
mo almmis nu maiddáai eatnama alde.
Atte midjiide odne min beaivválaš láibbi.
Ja atte midjiide min sudduid ándagassii,
nugo miige ándagassii addit velggolaččaidasamet.
Alege doalvvo min geahččalussii,
muhto beastte min bahás eret.

Dasgo du lea riika ja fápmu ja gudni agálašvuhtii.
Ámen.

8. Giittossálbma

Sáhtta geavahit ovdamearkka dihte sálmma 396, 455 dahje 477:4. Sálmma sajis sáhtta leat lávlla.

9. Buressivdnáduš

B/O Buressivdnidehkos min buotveagalaš ja árbmugas Ipmil,
Áhčči ja (+) Bárdni ja Bassi Vuoigŋa.

S Ámen.

DAHJE

B/O Hearrá buressivdnidivččii din ja várjalivččii din.

Hearrá čuvgešii muođuidis didjiide
ja livččii didjiide árbmugas.

Hearrá jorgalivččii muođuidis din beallái
ja attášii didjiide ráfi.

Áhči ja + Bárdni ja Bassi Vuoigŋa nammi.

S Ámen.

10. Loahpahanmusihkka

Loahpahanmusihkkan sáhtta leat sálbma, lávlla dahje čuojanasmu-
sihkka. Sáhtta geavahit ovdamearkka dihte sálmma 453, 456 dahje
477:4.